

Կ Ա Ր Գ

ԴԻՎԱՆԱԳԵՏԻ ԱՏԵՍՏԱՎՈՐՄԱՆ ԱՆՑԿԱՑՄԱՆ

Ի. ԸՆԴՀԱՆՈՒՐ ԴՐՈՒՅԹՆԵՐ

1. Սույն կարգով սահմանվում են դիվանագետի ատեստավորում անցկացնելու հետ կապված հարաբերությունները:

2. Դիվանագետի ատեստավորումն անցկացնում է արտաքին գործերի և միջազգային առևտրի նախարարության (այսուհետ՝ նախարարություն) մրցութային-ատեստավորող հանձնաժողովը (այսուհետ՝ հանձնաժողով)՝ «Դիվանագիտական ծառայության մասին» օրենքի (այսուհետ՝ օրենք) 18-րդ հոդվածի 6-րդ մասի 2-8-րդ կետերում և 7-րդ մասի 4-10-րդ կետերում նշված դիվանագիտական ծառայության պաշտոն զբաղեցնող դիվանագետին դիվանագիտական աստիճան շնորհելու, օրենքի 22-րդ հոդվածի 4-րդ մասով նախատեսված դեպքում՝ ժամկետից շուտ կամ արտահերթ դիվանագիտական աստիճան շնորհելու, ինչպես նաև սահմանված կարգով դիվանագետին իր զբաղեցրած պաշտոնին համապատասխանությունը ստուգելու նպատակով:

3. Օրենքի 22-րդ հոդվածի 4-րդ մասով նախատեսված դեպքում դիվանագետի արտահերթ՝ մինչև երկու ավելի բարձր դիվանագիտական աստիճան կամ օրենքի 22-րդ հոդվածի 2-րդ մասով նախատեսված ժամկետից շուտ դիվանագիտական աստիճան շնորհելու նպատակով ատեստավորումն անցկացվում է հերթական ատեստավորումից առնվազն մեկ տարի հետո:

4. Դիվանագետին դիվանագիտական աստիճան շնորհելու նպատակով հանձնաժողովի նիստերը, որպես կանոն, անց են կացվում տարեկան երկու անգամ:

II.ԴԻՎԱՆԱԳԵՏԻ ԱՏԵՍԱՎՈՐՈՒՄԸ՝ ԴԻՎԱՆԱԳԻՏԱԿԱՆ ԱՍՏԻՃԱՆ ՇՆՈՐՀԵԼՈՒ ՆՊԱՏԱԿՈՎ

5. Դիվանագետին հերթական դիվանագիտական աստիճան շնորհելու նպատակով ատեստավորումն անցկացվում է օրենքի 22-րդ հոդվածի 2-րդ մասում նշված ժամկետները լրանալուց հետո՝ հանձնաժողովի առաջիկա նիստի ընթացքում:

6. Դիվանագետի՝ հերթական դիվանագիտական աստիճան ստանալու ժամկետը լրանալուց հետո՝ հանձնաժողովի նիստից առնվազն մեկ ամիս առաջ, անձնակազմի կառավարման վարչությունը (այսուհետ՝ վարչություն) շրջաբերականի միջոցով դիվանագետներին տեղեկացնում է հանձնաժողովի առաջիկա կայանալիք նիստի մասին:

7. Շրջաբերականը ստանալուց հետո դիվանագետը հնգօրյա ժամկետում վարչություն է ներկայացնում իր կառուցվածքային ստորաբաժանման ղեկավարի կողմից տրված ծառայողական բնութագիրը, ինչպես նաև վերջին 6 ամսվա ընթացքում իր կողմից կատարված աշխատանքի մասին տեղեկանքը:

8. Ծառայողական բնութագիրը պետք է ներառի դիվանագետի մասին տվյալներ և նրա գործնական, մարդկային հատկանիշների ու ծառայողական գործունեության արդյունքների մասին հիմնավորված գնահատական:

9. Եթե դիվանագետը համապատասխան կառուցվածքային ստորաբաժանման ղեկավարի ենթակայության ներքո աշխատել է 6 ամսից պակաս, ծառայողական բնութագիր կարող է տրամադրել նաև դիվանագետի նախկին կառուցվածքային ստորաբաժանման ղեկավարը, որը ծառայողական բնութագիրը ներկայացնում է սույն կարգի 7-րդ և 8-րդ կետերով նախատեսված ժամկետներում և կարգով:

10. Դիվանագետն ատեստավորման նիստից առաջ պետք է ծանոթանա իր ծառայողական բնութագրին:

11. Ծառայողական բնութագիր չներկայացնելը չի կարող բացասաբար ազդել դիվանագետի ատեստավորման արդյունքների վրա:

12. Եթե դիվանագետը համաձայն չէ իր ծառայողական բնութագրին, ապա իր առարկությունները կարող է ներկայացնել հանձնաժողովին:

13. Վարչությունը, դիմումները ստանալուց և ամփոփելուց հետո՝ ատեստավորումից առնվազն տասը օր առաջ, ցանկը համաձայնեցնում է հանձնաժողովի նախագահի հետ:

14. Վարչությունը հանձնաժողովի նիստից առնվազն երեք օր առաջ փաստաթղթերը ներկայացնում է հանձնաժողովի անդամներին:

15. Հանձնաժողովի նախագահը ցանկում ներառված դիվանագետների հարցը ընդգրկում է հանձնաժողովի առաջիկա նիստի օրակարգում:

16. Հանձնաժողովն ատեստավորումն իրականացնում է փաստաթղթերի ուսումնասիրության եղանակով: Անհրաժեշտության դեպքում, հանձնաժողովը կարող է ընդունել բանավոր որոշում՝ դիվանագետին հարցազրույցի հրավիրելու մասին:

17. Հանձնաժողովը ատեստավորման արդյունքում եզրակացություն ընդունելու համար անցկացնում է գաղտնի քվեարկություն:

18. Հանձնաժողովի յուրաքանչյուր անդամ քվեարկում է փակ գաղտնի քվեարկությամբ (Ձև N 1):

19. Հանձնաժողովի որոշումն ընդունվում է հանձնաժողովի անդամների ձայների պարզ մեծամասնությամբ: Հանձնաժողովի անդամների ձայների հավասարության դեպքում վճռորոշ է հանձնաժողովի նախագահի ձայնը:

20. Հանձնաժողովն ատեստավորման արդյունքների հիման վրա ընդունում է հետևյալ եզրակացություններից որևէ մեկը՝

- 1) շնորհել հերթական դիվանագիտական աստիճան.
- 2) շնորհել հերթական դիվանագիտական աստիճան՝ ժամկետից շուտ.
- 3) շնորհել արտահերթ՝ մինչև երկու ավելի բարձր դիվանագիտական աստիճան.
- 4) դիվանագիտական աստիճան շնորհելու հարցը քննարկել մեկ տարի հետո.

21. Սույն կարգի 20-րդ կետի 4-րդ ենթակետով նախատեսված դեպքում հերթական դիվանագիտական աստիճան շնորհելու հարցը երկրորդ անգամ քննարկելիս, բացասական եզրակացության դեպքում՝ որոշել դիվանագետի զբաղեցրած պաշտոնին համապատասխանությունը՝ սույն կարգի 3-րդ գլխի համաձայն:

22. Ատեստավորման արդյունքները հրապարակվում են ատեստավորումից հետո՝ եռօրյա ժամկետում:

23. Դիվանագետը կարող է բողոքարկել ատեստավորման արդյունքում ընդունված եզրակացությունը բողոքարկման հանձնաժողով՝ համապատասխան արդյունքները հրապարակելուց հետո՝ մեկօրյա ժամկետում:

24. Բողոքարկման հանձնաժողովը ձևավորվում է արտաքին գործերի և միջազգային առևտրի նախարարի (այսուհետ՝ նախարար) հրամանով՝ հանձնաժողովի անդամ չհանդիսացող անձանց թվից: Բողոքարկման հանձնաժողովը կազմված է առնվազն երեք անդամից:

25. Բողոքարկման հանձնաժողովը դիմումը քննարկում է այն ստանալուց հետո՝ մեկօրյա ժամկետում:

26. Բողոքարկման հանձնաժողովը, քննության առնելով դիմումը, կազմում է հետևյալ եզրակացություններից մեկը՝

1) բավարարել բողոքն ամբողջությամբ.

2) մերժել բողոքը՝ հանձնաժողովի եզրակացությունը թողնելով անփոփոխ:

27. Բողոքարկման հանձնաժողովը սույն կարգի 26-րդ կետով նախատեսված եզրակացությունը մեկօրյա ժամկետում ներկայացնում է հանձնաժողովին:

28. Հանձնաժողովն ատեստավորման արդյունքում ընդունված եզրակացությունը (բողոքարկված լինելու դեպքում՝ նաև բողոքարկման հանձնաժողովի եզրակացությունը) ներկայացնում է նախարարին, որն ընդունում է հետևյալ որոշումներից մեկը՝

1) սույն կարգի 20-րդ կետի 1-ին, 2-րդ և 3-րդ ենթակետերով նախատեսված եզրակացությունների դեպքում՝ առաջարկվող դիվանագիտական աստիճանը շնորհելու մասին.

2) սույն կարգի 20-րդ կետի 4-րդ ենթակետով նախատեսված դեպքում՝ դիվանագետին դիվանագիտական աստիճան շնորհելու հարցը հետաձգել մեկ տարով.

3) սույն կարգի 21-րդ կետով նախատեսված եզրակացության դեպքում զբաղեցրած պաշտոնին դիվանագետի համապատասխանությունը ստուգելու նպատակով ատեստավորում անցկացնելու մասին:

29. Դիվանագետը եռօրյա ժամկետում տեղեկացվում է սույն կարգի 28-րդ կետով կայացված որոշման մասին:

III. ԴԻՎԱՆԱԳԵՏԻ ԱՏԵՍՏԱՎՈՐՈՒՄԸ ԻՐ ԶԲԱՂԵՑՐԱԾ ՊԱՇՏՈՆԻՆ

ՀԱՄԱՊԱՏԱՍԽԱՆՈՒԹՅՈՒՆՆ ՍՏՈՒԳԵԼՈՒ ՆՊԱՏԱԿՈՎ

30. Դիվանագետի՝ իր զբաղեցրած պաշտոնին համապատասխանությունն ստուգելու նպատակով ատեստավորումն անցկացվում է նախարարի կողմից՝ սույն կարգի 28-րդ կետի 3-րդ ենթակետով նախատեսված որոշման ընդունման դեպքում:

31. Ատեստավորումն իրականացվում է հարցազրույցի միջոցով:

32. Հանձնաժողովը ատեստավորման արդյունքում եզրակացություն ընդունելու համար անցկացնում է գաղտնի քվեարկություն (Ձև N 2):

34. Հանձնաժողովն ատեստավորման արդյունքների հիման վրա ընդունում է հետևյալ եզրակացություններից մեկը՝

1) դիվանագետը համապատասխանում է զբաղեցրած պաշտոնին.

2) դիվանագետը չի համապատասխանում զբաղեցրած պաշտոնին:

35. Ատեստավորման արդյունքները հրապարակվում են ատեստավորումից հետո՝ եռօրյա ժամկետում:

36. Դիվանագետը կարող է բողոքարկել ատեստավորման արդյունքում ընդունված եզրակացությունը բողոքարկման հանձնաժողով՝ համապատասխան արդյունքները հրապարակելուց հետո մեկօրյա ժամկետում:

37. Բողոքարկման հանձնաժողովը ձևավորվում է նախարարի հրամանով՝ հանձնաժողովի անդամ չհանդիսացող անձանց թվից: Բողոքարկման հանձնաժողովը կազմված է առնվազն երեք անդամից:

38. Բողոքարկման հանձնաժողովը դիմումը քննարկում է այն ստանալուց հետո մեկօրյա ժամկետում:

39. Բողոքարկման հանձնաժողովը, քննության առնելով դիմումը, ընդունում է հետևյալ եզրակացություններից մեկը՝

1) բավարարել բողոքն ամբողջությամբ.

2) մերժել բողոքը՝ հանձնաժողովի եզրակացությունը թողնելով անփոփոխ:

40. Բողոքարկման հանձնաժողովը սույն կարգի 39-րդ կետով նախատեսված եզրակացությունը մեկօրյա ժամկետում ներկայացնում է հանձնաժողովին:

41. Հանձնաժողովն ատեստավորման արդյունքում ընդունված եզրակացությունը, իսկ բողոքարկված լինելու դեպքում՝ նաև բողոքարկման հանձնաժողովի եզրակացությունը, ներկայացնում է նախարարին, որն ընդունում է հետևյալ որոշումներից մեկը՝

1) դիվանագետը համապատասխանում է զբաղեցրած պաշտոնին.

2) դիվանագետը չի համապատասխանում զբաղեցրած պաշտոնին:

42. Դիվանագետը եռօրյա ժամկետում տեղեկացվում է սույն կարգի 41-րդ կետով կայացված եզրակացության մասին:

43. Դիվանագետը, սույն կարգի 28-րդ կամ 41-րդ կետերով կայացված եզրակացության հիման վրա ընդունված արտաքին գործերի նախարարի որոշման հետ համաձայն չլինելու դեպքում, այն կարող է բողոքարկել դատական կարգով:

ՔՎԵԱԹԵՐԹԻԿ

Դիվանագետին՝ դիվանագիտական աստիճան շնորհելու

	ԱԶԳԱՆՈՒՆ, ԱՆՈՒՆ	ՇՆՈՐՀՎՈՂ ԴԻՎԱՆԱԳԻՏԱԿԱՆ ԱՍՏԻՃԱՆ	ԿՈՂՄ	ԴԵՄ
			☐	☐

« ____ » _____ թ.

Կ. Տ.

ՔՎԵԱԹԵՐԹԻԿ

Դիվանագետի՝ իր զբաղեցրած պաշտոնին համապատասխանության/
անհամապատասխանության

ԱԶԳԱՆՈՒՆ, ԱՆՈՒՆ		
	ՀԱՄԱՊԱՏԱՍԽԱՆՈՒՄ Է ԶԲԱՂԵՑՐԱԾ ՊԱՇՏՈՆԻՆ	☐
	ՉԻ ՀԱՄԱՊԱՏԱՍԽԱՆՈՒՄ ԶԲԱՂԵՑՐԱԾ ՊԱՇՏՈՆԻՆ	☐

«___» _____ թ.

Կ. Տ.